

澤雅堂詩集

澤雅堂詩集卷三目錄

五忠詩

二隱詩

周處士詩

張仲子詩

哭吳元吉蓮舟

陪許希庵國年師夜坐

與徐渠生夜坐卽贈

梅雨與渠生飲酒

城南晚游

寄子與上海

曉起

夢醒

聞楊寶彝抱山以詩見贈爲四十字速之

送抱山赴徐州

寄譚廷獻仲修

法華寺題壁

過亾友許乃嘉翰園墓

七月十五日夜西湖上作

巢居閣同費玉崙且泉袁振蟾爽秋

同余鑑鏡湖李恩植子篤游湖心亭

吳寶清禮園招飲極醉明日作此詩戲之

郭傳璞晚香招游西湖遂至孤山岳王墓湖心亭  
晚入錢王祠得詩五首

仁和汪鉞劔秋嘉道閒詩人也與烏程費丹旭曉  
樓交游二十餘年曉樓歿鉞錄其生平投贈之  
作百餘首聯爲大卷歸其子以耕餘伯藏之幼  
子以羣余弟子也亂後出視爲題其後曉樓工  
畫有名於時以羣字穀士

喜子與還郡卽送之揚州

葛仙祠小園作同鈕詠薇福弼

飯法華寺

李慈銘尊客自武昌還紹興行次杭州作詩贈之  
送泰興吳少宰師還都

春寒多雨庭中花木遲久未開

舟中

舟過來山漾

薛慰農時雨師滁山村學圖

輓高伯平均儒先生

擬漢饒歌十首

南來

澤雅堂詩集卷三

甲子至戊辰

烏程施補華均父

五忠詩

原任江蘇巡撫徐莊愍公

徐公秉節鉞蕭然如老儒官齋少僮僕垂簾躬著書敝  
裘三十年欲易還躊躇朝餐襍藜莧一飽忘精麤儉德  
化僚佐舉手戒侈踰綺羅入筐篋酒肉清庖廚顧惟念  
時事憂來常挽鬚長揖下寒士款款中心虛議論得一  
善背誦時嗟吁英英三吳彥脫略府中趨一從金陵潰  
盜賊方長驅空城少兵食束手望四隅夜半斬關入人

馬紛街衢從容北向拜臣歿隨三閭有子年十七有妾三十餘白頭一老僕慷慨同捐軀掣肘遭閹帥焉得備不虞全家付灰燼聊用酬區區王師下吳越駢首羣凶誅翩翩白旗旄遺骨還故墟居然直前謾美諡榮冥途平生感知已涕淚猶霑濡

巡撫銜福建糧儲道額爾德木巴圖魯趙忠節公

蒼鷹擊秋表眾鳥皆收聲趙公騁意氣動使羣兒驚自來英雄輩未必循準繩名成足千古萬喙無由爭吁嗟咸豐末粵賊攻州城我公起閭巷赫赫垂威名黃金酬灰土冀土何其輕五干部下卒一一思先登上馬意慨



慷慨揮軍才縱橫猝然風雨至殺賊如邛陵歸來飲醇酒  
十日拚膏騰傳其醉中語事事仍分明城圍旣三解蹴  
踏營壘平賊徒每西向慘淡愁無生一從杭州陷孤掌  
悲難鳴艱難五月守食盡歸摧傾銜刀奮罵賊求死猶  
未能南冠出就繫悲憤唯椎膺甘辭空勸勉掩耳百不  
應賦詩心激壯自比張中丞諸酋感忠義送死涕泗零  
偉哉公樹立大節能崢嶸區區鄉里閒譽毀都不憑崇  
祠父老拜美謚

朝廷旌陋彼一孔士尺寸方自矜

署紹興府知府前歸安縣知縣廖公宗元

字梓臣

刻覈爲循良殺戮爲慈祥廖侯治縣事黃口言之詳當  
其下車始侵晨坐堂皇霜棱見睂宇拂拂鬚髯張案牘  
數十事一掃如粃糠老吏發惶汗束手僵在旁去蝨牛  
得肥去螟禾得長鄉村捕大猾屠戮猶豬羊徒隸腰帶  
箭父老涕霑裳家家開戶臥肱篋今不防明年粵賊至  
睽睨窺城隍桓桓天水公一旅當披猖侯呼百姓語詞  
氣慨以慷相隨揭竿起倏忽兵威揚上馬左右顧備禦  
仍多方踊躍順指臂感激傾肝腸中間奉檄去百姓奔  
如狂攀轅共號哭失乳將誰望城門白日閉迴駕言蒼  
涼嚴程適有限後會庶可償焉知委劇賊兼無兵與糧

十日會稽守城亾侯亦亾我今作此詩匪爲知己傷長  
歌向衢道眾淚流汪汪

署烏程縣知縣許公承嶽

字桂山

許侯令烏程正值戰爭苦羣賊築長圍諸軍鳴敗鼓搜  
粟事紛紜斗升傾下戶騎馬出轅門好語聊安撫庖廚  
久禁煙瘦面人人覩號哭誓相隨登陴禦豺虎城門夜  
半開降將罪難數一歎謝丞黎斯人自千古

署湖協左營守備吳君鳳祥

字春梧

丈夫歿堂堂那願草閒活吳君飲刃時罵賊氣不奪識  
君咸豐閒意氣本疏豁區區一偏裨好士如飢渴自敘

二十年轅門充走卒辛苦脛無毛天陰作風疾竭來山  
賊橫防禦尤嚴密議論與時違空遭展禽黜元年湖州  
破妻子長流汨泉下俟須臾相從視皎日回身向豺虎  
瞋目動訶叱平生識忠義頭頸忍一割嗚呼君則亾遺  
事我能述一子寄臨安飢寒孰存卹

二隱詩

處士奚先生疑

字子復

乾嘉諸老翁零落歲已久城南佳山水長屬補榆叟

處士

八十後  
自號

平生乏宦情淡泊甘常守得錢多買書愛客自

釀酒新詩清徹骨句句傳人口心折戴尙書公

簡恪

造門

稱老友

拔貢生陳先生長孺

我愛桐屋翁中歲謝簪笏妙語清到心淡詩腴在骨商  
彝及周鼎古色照虛室閉戶日摩挲飢寒忍不出有婦  
亦忘貧相隨飢薇蕨垂老歿兵閒風流歎銷歇

周處士詩

名思誠字一庵

修德必受報孔顏應帝王人生貴守道禍福寧有常譬  
之亭亭松生近樗櫟旁采薪大縱斧美惡同見戕摧燒  
竈下盡志屈參天長吁嗟處士君至孝聞家鄉得粟養  
二親自咽甘糟糠有父年八十眊目重生光逍遙破屋

底捫蝨迎朝陽母老佐縫紉意適勞亦忘艱難享一肉  
味抵干牛羊夙昔奉杏子投核庭中央期年成杏樹結  
子皆金黃鄰里走相觀歎息貧家祥十試不登第黯淡  
名益昌傲睨誰氏子相對無冠裳庚辛浙江亂羣盜窺  
城隍從容率子弟講學開茅堂朝聞夕可歿患難庸何  
傷卒然被虜掠消息終茫茫豺虎不擇肉生存焉可望  
廬陵一行傳慨世言悲涼誰歟救薄俗我痛斯人亾

張仲子詩

名福傳

男兒斷頭歿未必非考終仲子九原下魂魄毅且雄平  
生性質直頗有前賢風廿年學天算列宿橫心胸書成

彗星攷西法皆開通攜來吳市上傾倒撫部公晚游東  
海隅回望烽煙紅皤皤七十母棄擲豺虎叢思量閒道  
入迎自干戈中親朋走相送黯淡無歡容干言蠟丸書  
密密衣閒縫茲行勉將士內外期交攻崢嶸賊壘滿願  
望山城空歧途誤投足適與羣凶逢羊牽更犬繫試頸  
棱棱鋒張目奮罵賊吾血當成虹誰能草閒活負此七  
尺躬嗚呼惟仲子不媿孝與忠翹翹趙觀弩大節堪追  
從羣愚牖下盡祇與牛毛同

哭吳元吉蓮舟

士夫相識盡始愛屠沽兒屠沽滿市井未若斯人奇道

喪各爲我意氣安可非虎口奪性命人活身幾危身危  
終勿悔但恨援救稀功成避其名天幸非力爲慷慨此  
肝膽遐想魁梧姿婉婉美丈夫見面翻驚疑亂世好拯  
人適與天心違短折以爲報萎絕瓊樹枝呱呱亦隨歿  
爲鬼常餒而禍福關世運初不準所施感君俠烈意慟  
哭吾無私不見道旁人含淚同聲悲

陪許希庵國年師夜坐

寂寞復寂寞屋底蕭蕭北風作十年獻賦長楊宮失意  
歸來竟垂橐短後之衣曼胡纓少年仗劍成勳名鄙人  
老矣謝簪笏硯田磽确猶堪耕著書本是窮愁事百年



粗糲吾心慰崢嶸冰雪抱孤芳窗外梅花多道氣寒宵  
耿耿燈火親弟子還如原憲貧一笑河汾門下士他年  
將相屬何人

與徐渠生夜坐卽贈

憶昨相逢戰伐新長衢交語意酸辛干戈已定書猶斷  
朋舊無多見倍親華月窺窗初滅燭微風開戶忽疑人  
空堂夜對肝腸熱不爲尊中酒味醇

梅雨與渠生飲酒

陰風三日寒梅雨不可止閉門畱遠客置酒空堂裏清  
醪坐斟酌檐溜聽未已銜杯勿忍醉憂患從茲始去歲

秋未登下戶飢欲死今春多淫霖積潦已瀰瀰分秧沒  
雙足根爛不得理誰憐傾盆勢復自中宵起亂餘桔槔  
稀歲久溝涂毀尺波卽沈浸垂淚對妻子城中米價高  
商賈色深喜皇天何不仁汜濫更如此窮年隱蓬茅吁  
歎徒爲爾荒廚出酒肉堆盤襍瓜李良會豈易多且耽  
尊酒美

城南晚游

無雨風亦好冷然吹我衣晚游南陌上漸覺炎威微油  
油禾黍長拂拂蚱蜢飛時見荷鋤人落日村中歸積潦  
不爲災天意憐民飢賚此一月旱釀彼千畦肥我儕縱

病熱敢議雲師非新月映溪出水白煙霏霏長歌返城  
闕草路行客稀

寄子與上海

回首平生總角交鼎鼎新塚徧荒郊如君憔悴同孤鶴  
何日翱翔返故巢世事龍蛇方起陸人心蕭艾易爲茅  
早茶晚筍饒鄉味莫漫年年客裏拋

我今租屋城南住卷幔溪山滿眼來時有諸生從問字  
偶逢佳興獨銜杯亂餘生計真難覘親在名心未敢灰  
只合投簪他日早看君松下飯牛回

曉起

昨宵微雨止枕簟生秋涼曉起桂花落滿檐風露香

夢醒

夢醒東齋暑氣收閒從枕上數更籌窗閒月色常疑曉  
雨後蟲聲漸似秋五鬼依然施狡獪四鄉何處任勾留  
著書閉戶多清暇畢竟虞卿尙未愁

聞楊寶彝抱山以詩見贈爲四十字速之

舊交如諫果回味獨難忘況復經離亂相逢老蒼雪  
消殘臘去春入早梅香知有新詩贈無由一盞嘗

送抱山赴徐州

楊君磊落人早歲誤文史垂老學班超慨然投筆起依

依別友朋忽忽向妻子高車方在門輪轉不可止淮徐  
旆影閒豐沛笳聲裏風吹領下髯立馬見千里轅門驚  
老卒幕府交奇士長揖少保公論兵似翻水行當擁貔  
貅一戰功名始平生窮到骨未許雄心灰牀頭一龍劍  
吐氣三霄紫先鞭君已著竝駕我將駛請看脫鞵騰扶  
搖有如此

寄譚廷獻仲修

會合豈須數在疏翻得親迢迢百餘里有路通夢魂猗  
歟復堂子詞筆當世珍游心八代上學古得其真空山  
吐秀語楮墨皆陽春遠出眾製表始知所處尊庭樹靄

以綠本故葉自新倦焉憶顏色閉目存其人大雅于茲  
在吾弱難爲陳惟慚篋中句但獲爪與鱗

法華寺題壁

青巘凌嵒巖上有叢雲萃中路耽休憩暫入前朝寺房  
宇信未多得地幽以邃階下散紅芳窗中流翠氣親人  
知佛性飲水識山味別徑再紆迴寸步峰巒異新篁交  
疏風孤松落微吹具區啟厚豁波浪入驚眙蒼茫遠色  
外時有孤帆至歸禽巖狀斂斜景林容闕回舟漾春流  
餘戀在岑蔚

過亾友許乃嘉翰園墓

臨絕言何痛幽冥覩坦途妻孥來世有豺虎此鄉無亂  
定窮交在神傷宿草枯唯應宵夢裏與汝醉黃壚

七月十五日夜西湖上作

湖光照夜明不爲月華生空外積荷氣煙中間櫓聲樓  
臺入縹緲絲竹含孤清獨有前游客淒其十載情

巢居閣同費玉崙且泉袁振蟾爽秋

佳處卽深坐孤舟忘在門水明花自照心遠我彌尊永  
歎高人逝同尋老鶴言蕭寥秋氣爽看月約開樽

同余鑑鏡湖李恩植子篤游湖心亭

初陽媚湖光蕩漾眾山影始辭城市囂寓目卽清迥羣

妙乃徐會諸慮還自屏策策樹響交羅羅水紋靜息羽  
伺來客恬鱗傍游艇軒窗得厚豁佳茗試龍井中流秋  
氣多在體已微領驚風動荷芰紅翠相與冷流連勝侶  
遭洒落高談逞相約雲林游更宿招提境

吳寶清禮園招飲極醉明日作此詩戲之

醒時憶醉時狂態多可笑當其醉未醒却自樂舞蹈公  
子出佳釀昨夜賓朋召晶盤閒翠釜列炬光相耀一飲  
三十六觴政幾乎暴傾摧幾大戶餘子那敢傲還聞新  
號令不數送鉤妙顛倒古人詩屬對苦難肖持尊受大  
罰觀者鼓而噪醉中無擇言諧謔舌先掉機鋒各思逞



往往相爲報壺觴忽已傾僮僕無乃盜酣情不可支齟  
齬聞鼻竅猶嗤古人拘羣飲著酒誥明朝宿醒解口渴  
殊未療霑濡襟上痕何異入泥淖終憐酩酊醉足以破  
瑣穰空腸遭浸灌請以小詩勞

郭傳璞晚香招游西湖遂至孤山岳王墓湖心亭晚入  
錢王祠得詩五首

遂泛孤舟入沖融窮窅閒談詩傾合坐把酒對羣山去

鳥翻波白迴林墜葉殷幽栖迷處所未得叩禪關

是日擬訪

月印僧  
未果

孤山千載後猶自屬先生將雪看梅樹因風想鶴聲長

吟遺草在獨坐小亭成廟食宜高士何關領郡榮  
自昔兵戈滿高墳此僅畱碑翻羣盜手鐵斷佞臣頭使  
者新封樹空山再薦羞蕭蕭秋草色江上六陵愁  
斜日筵初散清風酒易醒中流更孤嶼眾妙在空亭水  
荇牽晴碧山楓照晚青舊詩猶在壁拂拭感重經  
不睡龍何在蕭條殿宇空庭思披錦樹壁想射潮弓討  
賊漸羅隱歸朝比竇融卽今征戰苦終識保持功  
仁和汪鉞劒秋嘉道閒詩人也與烏程費丹旭曉樓交  
游二十餘年曉樓歿鉞錄其生平投贈之作百餘首  
聯爲大卷歸其子以耕餘伯藏之幼子以羣余弟子

也亂後出視爲題其後曉樓工畫有名於時以羣字  
穀士

吾生已是廿年後未識杭州汪丈人聞道詩名窮更大  
卽論交誼歿尤親臨文想滴鐙前淚此卷真成劫外塵  
只恐輞川遺墨少人間妙畫易通神

喜子與還郡卽送之揚州

知爾歸來歲月更殘旗廢壘不勝情空城欲入迷途路  
舊友相逢憶姓名廬舍焚餘成旅客干戈定後算今生  
浮霞墩畔泠泠水還與當年一樣清

還山未辦買山錢廿四橋頭又放船仍是別離今更遠

不同懷抱自相憐  
羈禽終傷誰家樹  
濁酒猶畱我輩天  
商略宦成偕隱去  
不辭鬚鬢各蒼然

葛仙祠小園作同鈕詠薇福弼

紛紜城市路縹緲仙人宮  
殿宇帶靈氣園林迴俗蹤  
紅芳媚晨露翠篠懷春風  
異羽欣同條今草生昔叢承  
池遂水性列石表巖容文階  
苔蘚淨虛戶煙霞通神丹在  
政美道書誇文雄非甘餌紫  
芝聊學隨赤松孰謂棄身  
世冥冥淩太空

飯法華寺

遠林近壑陰雲低  
春雷細若嬰兒啼  
山僧拂席自畱客

竹筍登盤初出泥屋好恰隨山上下泉鳴不辨廚東西  
茲游但早七番歲便看坡翁扶杖藜

李慈銘尊客自武昌還紹興行次杭州作詩贈之

李子西辭黃鶴樓長風浩蕩吹輕舟千里江山發歸興  
四時懷抱皆寒秋臨安城下草如織青春過半披裘出  
安心已抵到家人多病唯餘著書日去歲東游駕樓櫓  
彭郎磯畔空懷古小姑窈窕看題詩青天飄墮神靈雨  
卽今歸夢滿家山尙覺狂名動吳楚寒燈蕭瑟吟新篇  
倦客支離畱夜語錢唐江上春雨晴明朝又買扁舟行  
沙頭白鷗羽矯矯煙中鄉樹花冥冥知君離別難爲情

歌詩慷慨君爲聽人生那得長合并要令眞氣滿大宅  
來看八月秋潮生

送泰興吳少宰師還都

名存義

文星長照浙江波疲馬羸車道氣多每對諸生如子弟  
可憐羣籍委干戈池中芹藻添新葉網底珊瑚出舊柯  
聖主卽今求俊乂老臣欣聽鼓鐘和

今皇垂拱萬方平黃髮還

朝見老成久爲鼓鼙思將帥重興禮樂待儒生上書賈  
誼論三少入學桓榮備五更

闕下正嗟耆舊盡漫言陽羨買田耕

春寒多雨庭中花木遲久未開

一花分一春寒煖各呈態中庭種植多日與羈人對在  
再二月馳肅令未受代夕雨有朝滴晨暉無晚曖見葉  
斯知根生機殫其內陽葩含細風欲吐仍自愛旅懷方  
畏寂物性況思媚期望良區區旦暮寄眄眄

舟中

沙鳬引子蔣抽芽纔近塘棲未到家疑著扁舟圖畫裏  
一篷春雨萬桃花

舟過夾山漾

初篁寫風態遠岫表雲姿去美目尙送來奇心已馳扁

舟行在近佳日坐忘疲山芙蓉陰嶺林華絢陽枝舊萍  
泛新碧晨麥懷夕滋篷移宿羽起波動驚鱗窺景物信  
多狀若爲幽人私估帆自南北勝賞應未知

薛慰農時雨師滁山村學圖

平生冷笑趙學究論語半部何曾通挾智任數取宰相  
預人家事乖始終何如今日薛夫子舉比坐擁滁山中  
諸生執經左右立口講手畫無倦容一朝射策見天子  
十年作吏飲江水教民還似求童蒙斷獄居然引經史  
古來循吏正如此吁嗟乎秀才瑁璫吟秋風此中大有  
天下士



輓高伯平均儒先生

物理有顯晦達人道爲權營營殉哀樂無乃搖我天五  
年居講舍老矣華其顛彈琴一室內情性相周旋名潛  
道彌耀形病神自全倏忽桺生肘任化甯非賢老彭終  
夭折殤子匪無年單張競所養吁嗟違自然恂恂幾徒  
役寶此述作篇身外卽糟粕何用矜言詮平生申末契  
浮慕因之捐忘懷終未易涕泗猶漣漣

擬漢鐃歌十首

並序

漢鼓吹鐃歌十八曲奇詞奧響寄託微茫以意讀之  
有感有諷後之擬者託體並殊陳思匪一豈非世有

風氣人有性情古調新聲賢於麟楨歟且其原詩當時有司采入樂府半非軍中之曲則指事言情爲類甚廣拘于饒吹且廢本詞宏惟

熙朝

神聖纘緒於今九世二百餘年扇巍巍顯翼翼

武功

文德咸五登三載在

實錄藏之

天府草莽之臣罔識萬一唯是衢歌華祝野人含誠敬就前題自爲次第賦詩十章以極歌頌

聖人出

聖人出紀發祥也長白峩峩比漢芒碭

熙朝龍興有奇瑞焉

長白山蜿蜒氣天女下嬉水湄朱果何纍纍朱果食

聖人福子孫千萬年有中國

上之回

上之回頌武功也逆藩反側海內震驚

六師親征咸授首焉

太陽瞳瞳出列星韜光

皇帝詔討三叛招搖爲上將句陳元武左右超驤二十

有四年賊授首九州蕩蕩

雉子班

雉子班美蒐獵也宏惟

聖祖天縱博物塞外打圍識奇獸焉

天門開殷鑠車聲武士繞獵膊山趾谷其來驚霆刑天  
舞駁馬鳴物吁可怪

聖人呼其名包干戈天下泰平

芳樹

芳樹貴德也尚書臣斌蔽于讒邪

聖祖鑒之天下頌美焉

陰雲冥冥覆我芳樹烈風倒吹搖根株白日來照之陰  
雲開烈風息芳樹青葱還汝顏色

上陵

上陵禮明陵也

聖祖南巡祀有明太祖孝陵置守官禁樵采焉

九游動萬彙來孝陵穹崇氣佳哉敬告明太祖皇帝金  
枕玉魚疇敢窺鬱鬱葱葱千萬歲如斯

艾如張

艾如張舉宏博也康熙十八年乾隆元年兩設是科  
通儒雲興焉

大清有天下兩詔郡國求通經術者耆儒彬彬集于  
皇都

天子臨軒策之官翰林侍從朝夕盛典百年吁可慕  
朱鷺

朱鷺臣緬甸也南夷懷德願與朝覲有振鷺之思焉  
南夷張威弧

皇師有赫南夷不敢逆臣黎某臣阮某再拜

皇帝陛下歲歲貢象守

皇帝門閭

擁衛

擁离

重離繼照也

高宗倦勤

仁宗嗣統堯舜之盛見于

本朝焉

日重輪月重光照乾坤浩蕩蕩百姓壽考五穀豐穰四  
夷威服雞不鳴狗不吠伏惟

太上皇帝

皇帝陛下錫慶

巫山高

巫山高述蜀險也教匪入蜀寢以蕩滅近時石逆又  
成禽斯土焉

巫山高其下水利如刀土不可以絙下不可以舟飛鳥  
徘徊出劒門斂翮以憂何況穴中蟻子無羽毛

遠如期

遠如期歌

太平也

列聖相承及于

皇上千戈載戢遠夷來臣焉

今



皇帝嗣位七年

湛恩汪溢鳳凰翩翩芝草被乎金隄有西王母國于崑崙之厓藥風降

闕廷稽首朝我今

皇帝

南來

羣盜縱橫十載餘南來消息近何如徒聞張角多遺黨  
未信孫歆有捷書秦晉烽煙隨地起青徐草木入春疏  
大官莫更征輸急好遣逃亡返井閭

誰遣潼關萬馬蹏乘虛直度太行西五城將士擐兵甲

三輔山川動鼓輦秋隼未看荒野擊夜烏偏傍  
禁門唳臨危歎息宗臣逝回首馮屯落日低

澤雅堂詩集卷四目錄

贈潘鴻儀甫

送張鳴珂公束入都

憶子高金陵

皋園

呈彭雪琴宮保

重建平湖秋月三潭印月祠宇落成紀事楊石泉

中丞師命作

杭州逢楊峴季仇有贈

湖心亭坐月

汪曾唯子用邀游雲林寺

宿何山寺贈靜觀和尚

送楊黼香太守師入覲

徐壽蘅侍郎師於學署中新葺約園分題命詠

古意

夜渡太湖

自蘇州至上海道中偶作

游金山憩江天寺

種桑篇爲沈仲復先生作

題鶴秋行看子

連日住廣陵與鶴秋子與輩宴飲

贈丹徒莊棫中白

別弟

晚晴

黑水洋

舟泊煙臺山下

楊村旅店題壁

慈仁寺謁顧亭林先生祠

登陶然亭同劉僉贊子彝吳鍾奇子常

天甯寺看牡丹同楊長年樸庵同年

澤州集卷四  
升天行

詠卞和一首寄趙銘桐生同年

由京師至天津途中襍作寄呈潘伯寅侍郎張孝  
達編修胡荻甫郎中趙益甫大令

行次東光縣醉題旅壁

平原城下作

齊河縣

同劉子彝王蘭醉鄉游濟南城西廢園遂至釣突

泉遇雨

歷下亭飲酒贈子彝

襍詩

醉時歌贈丁彥臣小農

尙志堂同丁祖德桐孫

長清道中

泰安道中

登岱

迴馬嶺

五大夫松

碧霞元君洞

秦皇勒石

山路崎嶇車行甚苦戲作一首

羊流店謁羊太傅祠

蒙陰

垛莊旅舍題壁

二疏故里

青駝寺

舟中有憶

與丹徒莊中白書係一絕句

舟過揚州思訪子與不果至京口却寄

夜泊京口至風神廟訪沈增雲門



晚泊丹陽城下

無錫舟次七夕

閭門曉發

澤雅堂詩集卷四

戊辰至辛未

烏程施補華均父

贈潘鴻儀甫

綢繆不可方一心終始之結交固有自意氣安能爲飛  
鳥顧其羣嚶鳴常相隨天風吹不息中道防乖違乖違  
良可念念在合并時羽毛具文采保此天所私中庭兩  
喬木春陽映高枝青葱好顏色歲晚以爲期令名亦其  
寶有寶勿自遺空山采遠志一爲佳人貽

送張鳴珂公束入都

故人翱翔去猶復傷離別窗鐙耿餘光夜語極騷屑一

室與千里動反親疏轍會合非偶然惜此分攜節僧廬  
二月聚頗取性情悅豈惟文字緣昕夕供磨切長風吹  
健羽送爾傍雲日徘徊戀舊林超忽遵新術傷禽擇深  
柯聊欲養毛質會待秋霜清一向寒臯出輸爾搏霄姿  
程途已殊絕

憶子高金陵

寂寞臺城路曾無一紙書舊交思有幾多病近何如養  
性迂疏裏窮經患難餘幾時兒女大爲爾守門閭

臯園

過雨蒼苔一徑滋丹青樓閣隱參差石閒修竹斜抽筍

牆外春流細入池客散轉憐芳榭靜鳥啼應戀夕陽遲  
林花如霰徘徊看喜近成陰結子時

呈彭雪琴宮保

名玉麟

頻年忠信涉波濤儒將功名百戰高樓櫓橫江隨號令  
龍鼉迴浪避旌旄千秋鏡裏看華髮五夜鞞中出寶刀  
今日東南烽正息閒將野服換征袍

不教魚鳥識句陳竹杖芒鞋自率真南嶽精靈生上將  
西湖煙水養閒身招來滿坐青山好畱得揮軍白羽新  
早晚

絲綸金闕下蒼生終屬臥雲人

重建平湖秋月三潭印月祠宇落成紀事楊石泉中丞

師命作

名昌濬

達人外簪笏煙水得所娛翦刈孤山側層構臨全湖朱  
闌循迤邐翠樹交扶疏輕鷗傍幽戶細浪鳴前除摩豁  
旣增舊崢嶸還切虛復此尊俎宴樂與賓佐俱明明沙  
隄月流照來坐隅曠宇亦已改清暉良不殊遠覽信蕭  
爽日夕冲襟舒

三潭深不測波浪時相春秋月夜深至照見潭中龍壅  
流起芳榭架水構丹宮威夷草徑闢曲折荷池通靈境  
旣重啟芳席聊追從浮屠列煙際倒景流溶溶游鱗動

圓沫舞藻交輕風宏製貽後紀清尊希前蹤持問白蘇  
守澄懷應與同

杭州逢楊峴季仇有贈

蒼茫一別二十年人世猶堪幾回別敝裘羸馬登我堂  
雙鬢蕭蕭已霜雪靈風鸞鶴交迴翔舊游半在青霄旁  
平生奇藥不龜手老矣江湖泝澣統吳山道士狂方四  
能談二十年前事歌哭無端兩醉人題詩時挾雲雷氣  
揭來日日官齋居飛章草檄勞何如白頭書記擁旌節  
當代寧無高達夫

湖心亭坐月

四山落日青模糊晚煙冥冥吹滿湖煙際小亭林嶼孤  
扁舟欲往穿菰蒲中流凝望丹碧殊文窗面面風濤俱  
繫舟登岸循階除曲廊暗轉增縈紆坐見驪龍初吐珠  
清光倏忽盈衣裾湖波一半如銀鋪沙頭拍拍驚睡鳬  
須臾上下涵清虛水月摩盪纖塵無桺隄花港畫不如  
收縮萬有藏冰壺兩三幽火看叉魚遠艇搖漾疑可呼  
浦風激激浪花麤人聲隱約風中疏倒影況有雙浮屠  
波心橫臥誰能扶此月曾見白與蘇湖中載酒賓朋娛  
今夕照我來坐隅良會欲問千年餘坐久涼冷侵肌膚  
草閒玉露方霑濡解纜頗覺幽情攄月亦隨我登歸塗

千門萬戶睡夢初迎我但有城頭烏

汪曾唯子用邀游雲林寺

奇哉山門開眾壑勢飛動上有叢樹陰下有亂泉涌孤  
霞接巖表驚飈振崖孔幽覩神易寂淒聽心常悚僧房  
隨坐作花草香鬱蓊羣嬉幸今暇獨陟矜曩勇聞鐘漫  
言歸食菜紛辨種皓月窺人來窗戶如流汞

月出巖壑曉物我皆清寒時聞老鸛鵲磔磔鳴雲端夷  
塗轉松樾仄徑緣岡巒亂石若奇鬼森立誰敢前杳冥  
度陰洞淒厲隨哀湍長風吹瘦竹影動虵蜿蜒始知山  
中月天與孤僧看此心尙塵垢幽極難爲歡歸來堂宇



靜佛火方熒然向師乞定力一證如來禪

宿何山寺贈靜觀和尚

寂歷何山寺來游世慮清眾峰沈雨氣萬竹合風聲  
靄人村遠幽幽佛火明病僧知稼穡聊與話秋成  
缸面開新釀畱人夜話長蠶鹽清佐饌燈火晚春糧  
病榻支虛室寒厖吠隔牆依然窮杜甫遠宿贊公房  
送楊黼香太守師入

觀名榮緒

郡邑初收日流亡乍返時尙驚羣盜亂眞賴長官慈  
案牘心常苦鞭笞色不怡殘黎紛滿目愛養比嬰兒

六載賢勞意循良眾口稱催科常苦急聽獄忍言能荒  
隴禾俱長新村屋漸增吾民真吐氣欲爲和春陵  
衙齋屬清晏萬卷日相親愛士如佳客論文到古人庭  
虛花自落事少吏俱貧試覩循良傳文翁教授頻  
漢廷稱吏治第一屬吳公入覲

天顏喜重來眾望同湖山含別意僚吏語清風何況居  
門下私恩感未窮

徐壽蘅侍郎師於學署中新葺約園分題命詠

名樹銘

鬱鬱檐際樹溶溶橋下波齋居絕遠騁卽事唯弦歌萬  
有盡在列所操良不多

約園

方池搖淥水芙蓉發鮮新朝暉弄顏色媚此亭中人采  
采將貽誰芳氣彌衣巾

定香亭

層樓狀茗亭窗牖延二曜輝光亦何私高處自先照西  
北送煙鴻長安幾時到

恩暉樓

官齋久養志未數閒居樂愛看嶺上雲時坐林閒閣飛  
鳥晚歸來檐楹欣有託

慈雲閣

置酒臨高臺慨然思往者

謂阮文達公

簪組萃羣英名譽還

相假蘭蕙懷春風清芬滿臺下

仰高臺

小草託平洲生意將誰引一自春波生參差水中影王

公諒可羞義與蘋蘩竝

芣苢

達人順所遇不苦冠蓋拘區區形爲役神理長自娛  
援琴邾上鼓清風來四隅

養和書屋

古意

案上銅壚器氤氲自吐香郎心如白雪妾意怨朝陽  
十三隨阿母只學繡鴛鴦日月西邊出儂心不向郎  
明鏡啟妝臺盈盈好睂嫵郎愛秋瓜甘莫棄蒂邊苦  
篝鐙夜輝輝獨坐形憐影儂心有轆轤無那逢枯井  
棉衣新製得秋至寄郎邊看儂鍼綫迹何處不相連  
西北浮雲起歸期未有涯春風嬌欲語無數向陽花  
游絲冒芳樹寂寂戶庭空春草無情物生郎履迹中

日日起妝束漸嫌衣帶寬可憐百沸水容易釜中乾  
夜渡太湖

挂席不能寐起聞鴻雁聲雄濤動空闊孤月抱虛明山  
向中流涌天隨極浦平鳴榔發高詠多恐睡龍驚  
自蘇州至上海道中偶作

午潮初退見沙痕百丈牽江及未昏落日殘旗臨水驛  
寒鴉疏樹遠人村鄉心宛轉空書札旅景淒涼且酒尊  
兒女鐙前相憶否扁舟昨夜發吳門

游金山憩江天寺

夜夢東坡與我言江天寺口波濤惡今朝乘興金山游

落木蕭蕭大風作江流赴海山臨江寺依山面開軒窗  
兩三僧侶守空寂經聲欲遣蛟龍降遙天晚日寒潮涌  
斷石崩隄勢搖動蒼茫還挾戰征愁顧盼方知形勢重  
門外山光黯淡青自攜修綆汲中冷塔鈴獨語千年事  
笑問山僧可解聽

種桑篇爲沈仲復先生作

名秉成

我行京口道比戶皆栽桑清霜被原野落葉忽已黃老  
農爲我言亂後田廬荒賢哉沈大夫貽此種植方一年  
桑短短二年如人長三年葉可采高枝出屋牆桑下莫  
種豆種豆地力傷墾土莫縱手慮與孤根妨愛惜事培

壅桑本日以強蟲來囓桑本捕治如螟蝗內蟲附枝節  
剝蝕尤須防初采畱其餘勿令生機戕于野召父老大  
夫言之詳小試始五畝繁植旋諸鄉猗猗十萬樹陌上  
爭提筐大婦歸飼蠶中婦繅絲忙買絲頗得錢已製新  
衣裳吁嗟栽桑利足以濟稻粱經營三年久所賴恆心  
將土宜信能辨民勞今有償請歌種桑篇垂蔭同甘棠  
題鶴秋行看子

空林振寒響眾壑交窮陰蒼然太古雪洗此幽人心冥  
坐謝人事洞天何阻深

洞天渺河處窅夢巖谷天風落瑤華香滿道人服他

日許爲鄰層崖縛茅屋

連日住廣陵與鶴秋子與輩宴飲

遠游歲將暮恣看廣陵潮復此芳尊合多勞野客招銜  
杯問明月卷幔盪寒飈淒斷簫聲咽煙沈廿四橋

琵琶無限悲倡婦弄新姿冉冉花當齒彎彎月映睂酒  
闌人語狎坐久燭花垂獨憶乾嘉代平山絕盛時  
贈丹徒莊棫中白

呱呱墮地哭憂患已有端誰能學渾沌茫昧全其天憂  
患亦甚大乃繫飢與寒神明爲摧損我意嗟才難登高  
俯大江浩浩生波瀾惜哉英雄人變滅如雲煙秋風振



衣袂林葉忽已丹孤鳥鳴徘徊何以振羽翰學道斯任  
運百慮無由干贈子以自愛用結綢繆歡

別弟

祿至無可養焉用千鍾爲出門情惘惘計日嗟淹遲親  
戚走相送榮達以爲期臨歧強言笑疇識中心悲淒惻  
復淒測與汝同根枝此時兩親在歡喜良可知南山松  
柏下孤墳草離離平安就長道爲我代告之

誰謂仕宦樂憂患方在今憂患天所寄未忍逃山林謳  
歌與怨謗何者爲好音默計後時獲安適非所歆遙遙  
古賢達千載知其心獨坐覽文史懷慕良高深操作以

自活汝力猶能任母爲希富貴擾擾傷冲襟

道義內不足福至憂身輕讀書三十載僅以持紛營世  
人笑我拙再拜受其名窮達命爲主何用機智爭驅車  
將遠道吁嗟念同生有兄拙如此諒無時世榮吾子生  
七歲耳目猶聰明歸時述所語命彼散而聽

晚晴

極浦含殘雨孤舟載晚晴開簾春氣暖把卷客懷清潮  
急魚爭上泥鬆筍漸生前行江市近酒價可能平

黑水洋

海色如傾墨奔崩未有涯雄濤浴魂夢惡霧走蛟蛇昏

旦中流變燕齊一綫斜客程能計否簾底乍鐙花

舟泊煙臺山下

怪石縱橫壓浪驕山亭一角望蒼蒼頽黃未換春天樹  
危綠爭飛落日潮沙岸房櫓延暝色舵樓笳吹咽回颿  
我來正值晴和節却惜登州蜃市銷

楊村旅店題壁

南人只解棄船好一日馳驅已覺勞曉晚寒雞看上樹  
嘶風疲馬聽爭槽黃塵黯黯春猶遠白酒沈沈氣尙豪  
明發應知天路近五雲深護

鳳城高

慈仁寺謁顧亭林先生祠

蔓草枯楊斷客魂，  
竭來煙寺閱朝昏。  
雲霄不傍諸甥貴，  
涕淚難忘老母言。  
短鬢蕭疏臨易水，  
長歌慷慨賦夷門。

山頭棠樹花爭發，  
杜宇聲聲萬古冤。

先生至京師  
卽寓寺中

地老天荒萬事非，  
徵書迢遞此心違。  
遠游關塞身將老，  
何處山陵淚獨揮。  
著作必傳羞待訪，  
鄉園雖好忍思歸。

雙松謾謾經行處，  
唯有祠堂傍夕暉。

登陶然亭同劉僉贊子彝吳鍾奇子常

傑閣清虛

紫禁旁登臨風景近，  
家鄉依然好鳥嘯。  
芳樹時有春雲

覆女牆鮮鯽登盤邀客醉野蘆抽水似人長煙塵不隔  
東西市應笑輪蹄儘日忙

天寧寺看牡丹同楊長年樸庵同年

樸庵六十登  
賢書上元人

黃蜂紫蝶滿簾櫳三月僧廬見一叢春色欲酣初拂露  
奇芬自吐不因風託根清淨離塵久顧影莊嚴與佛同  
葉底更看畱晚蕊羣芳開盡尙猩紅

升天行

縹緲乘雲翔言近清虛府蕭蕭白榆林落葉紛如雨鴻  
龍玉狗不嚙人珥尾直似牛羊馴紫房丹室望隱約非  
煙非霧人間塵神仙遊戲各無語天魔得意婆娑舞

詠卞和一首寄趙銘桐生同年

楚國有卞和搜山得奇寶奇寶雖在璞含精未枯槁顧  
惟匹夫義莫敢私褻抱殷勤獻王廷愚忠諒可表九賓  
未及設讒邪工嫉媚雷霆發上怒則足加嚴討嚴討亦  
何辭深憂且終老砥礪方見珍獨辨連城好相知結幽  
隱斯人古來少奇寶聽我言英華長自保剖析會有時  
珮琢施文藻偏災信善禦用汝申祈禱

由京師至天津途中襍作寄呈潘伯寅侍郎張孝達編

修胡荻甫郎中趙益甫大令

侍郎名祖蔭編修名之洞郎中名樹大令名之謙

朝辭宣武門迢遞卽長路微雨洗飛塵川原遠迴互東

西亘大道車馬紛無數今古此驅馳誰能語其故幽幽  
日光暗杳杳人村暮晚飯墟裏煙新陰檐外樹天際長  
安城躊躇重回顧

瀟瀟雨不止槭槭風增寒野店久淹滯形影嗟孤單臥  
聞樾下馬聲嘶一何酸長途泥漉漉奮足良獨難濁醪  
供晚飲野藿充朝餐道路艱且苦始識窮居安美人盼  
窈窕遠在層雲端情懷信可憶鄭重青琅玕

晨光動遠郊雨氣潤羣木持火束衣裝窗雞鳴喔喔登  
車重徘徊泥深沒雙轂川塗防滑澆我行安得速我行  
良已遲卽事增感觸老烏東南飛猶戀野人屋暫止榆

樹陰近下麥田熟親愛去愈遠歡娛悵難續亭亭西山  
雲終朝勞我目

初日遽隱見我行還向東清川散夕霧高柳裏晨風躡  
蹠及百里塵勞心忡忡時因淤泥苦默念疏鑿功治田  
先治水布令由司空儻分津沾利遂決溝渠通千畦資  
灌溉禾稼秋成豐公私足倉廩稍緩東南供罪言寧敢  
吐旅況良已窮飲馬古亭下休息聊從容欲將車中意  
私問耕田翁

行次東光縣醉題旅壁

一琴一劍兩車輪莽盡天涯白髮新西嶽有靈應告我



東流欲挽更何人  
龍蛇大澤虛三顧  
風雨高歌動四鄰  
笑問濁醪誰造汝  
朝朝旅店與相親

平原城下作

平原城下禾芄芄  
平原城上鴉嗁風  
買絲誰繡趙公子  
邱墟憑弔斜陽中  
公子翩翩信英妙  
食客如雲廣收召  
終無一策破秦師  
長平骸骨徒傷悼  
公等碌碌常因人  
何怪樓頭趙女笑  
平原食客難却秦  
信陵食客空紛紜  
侯嬴朱亥兩奇士  
姓名未列三千人  
乃知英賢臨難奮  
忠義不在區區感  
私惠君不見毛遂  
兩言成楚盟魯連  
一笑無秦帝

齊河縣

酒醒風吹面輕車出晏城馬頭橫岱色枕上落河聲鬢  
鬢將催老文章尙噉名何時遂初志溪畔買牛耕

同劉子彝王蘭醉鄉游濟南城西廢園遂至趵突泉遇  
雨

車馳馬驟乍辛苦晴游腰腳依然輕要將七十二泉水  
洗我肺腑長孤清城西古園極森爽曉著衣履從劉生  
幽林吐花弄妍色新荷拆葉搖微馨一雨初霽眾泉出  
流波高與軒窗平頗聞大賢事尊榼定知雅抱無簪纓

園爲李山農  
方伯所得

更來道院觀趵突入戶已訝春雷鳴無端

平地涌數尺坐覺亭榭含飛驚去年我宿京口寺曾攜  
老衲探中冷跳珠濺玉氣噴薄奇絕足與茲泉爭微風  
淒淒動襟袖急雨颯颯飄檐楹歸來引被作午睡枕寢  
恍襟煙濤聲從容夢揖李北海邀我題詩登歷亭

歷下亭飲酒贈子彝

海右今無李北海朱轡玉佩誰當歌歷下古亭一尊酒  
唯餘我輩招邀過六月衣裳不知暑涼風千頃吹空波  
須臾風定塵鏡拭照影自笑顏微酡水鳥驚飛呼格磔  
相攜醉折迴汀荷坐中劉生舊相好遠性與俗殊曰科  
十年奔走今老矣歸夢時繞南山阿撫時已歎秋氣至

弔古仍覺哀情多題詩欲問杜陵叟扁舟落日心如何  
襍詩

微禽託卑枝于飛無百步適與順風遭迢遙卽天路遠  
舉凌雲霓羣栖謝儔侶何處舊林巢青冥嬾回顧丹山  
孤鳳皇悲鳴向誰訴羽短不能長迴翔巖際樹鶯鳩笑  
其翬文采亦徒著何如尋文游轉得安我素

青蔥桂之樹託根南山坡高枝交密葉鬱鬱生氣多自  
其尺寸長霜雪常封柯凌寒乃天性不在春陽和清秋  
吐花蕊奇馨飄巖阿安得淮南王招隱山中過攀緣此  
幽樹卽事成哀歌眾芳歎銷歇柰此商飈何

萬蘿在深山結根亦云固自非青松枝焉得長依附不  
見甘瓜蔓空牆久盤據空牆易傾翻零落棄中路游鱗  
傍重淵肅羽擇深樹因緣良獨難躊躇庶無誤歧途迷  
東西毋爲傷日暮

良駒伏下阜未與天閑進仰首驚駘中矯矯自神駿芻  
豆非所戀駕馭終能順主恩無淺深馳驅乃吾分從容  
氣不矜崎嶇力逾奮無端試嘒齧磨折餘龍性是物精  
靈聚顯晦關時運何時九方皋鹽車親顧問

珠簾垂窈窕鸚鵡嘒春風丹觜承朱距翠毛一何豐自  
緣文采誤久係樊籠中況茲久調舌宛轉言語工益被

主人愛解脫當無從低徊金屋託顧盼青霄空不見林  
間鳩垂羽無儀容飛彈自不及于飛隨西東雖乏豢養  
惠轉免羈絆窮

醉時歌贈丁彥臣小農

二十年前兩俠少高歌痛飲城東頭富貴由來一腐鼠  
相嚇乃有林閒鳩驚颺吹折庭中樹送汝蒼涼出門去  
遙聞江上擁貔貅幾向沙頭問鷗鷺三十郡司馬四十  
朝大夫濟南城裏一相見領下頗有鬣鬣鬚今來如虎  
昔如狗此生變幻無不有磊落依然可笑人淹留且飲  
亡何酒大明湖畔涼風多荷花菱葉搖空波科頭徒跣

對簪組狂夫醉矣猶能歌酒闌客散華月吐淒淒肺腑  
能相語贈君唯有太山雲六月人閒望霖雨

尙志堂同丁祖德桐孫

中丞羅俊彥上舍啟華省投戈論文藝志與古先竝虛  
堂絃誦清廣院塵囂屏晨游命儔侶蕭爽忘炎景雲生  
野館陰風過幽林靜細石滋苔紋空潭洗花影觀物幸  
今暇學古媿前猛行歸事蒐討毋及簿書領

長清道中

山雲拂馬飛侵曉雨露衣積翠林陰重浮煙岱色微途  
長邀客共時與吳百一心定識涼歸一晌車中臥安知

同年偕行

旅況非

泰安道中

十日平原縱酒還輕車處處坐看山人家半住浮雲裏  
驛路斜穿亂石閒林際層城迷杳靄雨餘諸澗合潺湲  
明朝待浴滄溟日岱頂千尋躡屐攀

登岱

南涵吳楚北幽燕齊魯分明列几筵滄海一丸看日出  
翠屏千仞與雲連丹楹碧瓦新祠宇玉檢金泥古歲年  
此去已通霄漢路遙遙天語若爲傳

迴馬嶺



肩輿來不覺回首路千盤林雨百泉響山雲六月寒陰崖迷竹柏古殿肅衣冠沒字碑猶在當從絕頂看

五大夫松

傳是秦時物亭亭五樹同垂陰羣木上迎客亂雲中鶴返青霄月濤翻翠壑風驪山烽火後無此鬱葱葱

碧霞元君洞

雲氣蓬蓬出從尋玉女祠靈風吹石壁空翠落盆池環珮疑天際馨香自古時還思西嶽頂露浥井蓮滋

秦皇勒石

冒死刊功德巍巍岱頂碑千秋開小篆十字贗諛詞石

氣連雲秀苔紋繡雨滋遺文存廿九

補刻亦瑰奇  
字爲

後人  
補刊

山路崎嶇車行甚苦戲作一首

山石槎枿密排齒車行一里抵十里上坡下坡石尤惡  
如虎負嶠牛飲水有時失手輕一擲傾臥雙輪堅不起  
人號馬驚滿崖谷輕者扶傷重者死稍從犖确得平行  
復訝馳驅阻泥滓泥滓未去崎嶇來後嶺前岡略相似  
顛簸已恐臀無膚昏眩難矜目司視丈夫仕宦出門始  
抱險騎危類如此何不南山負耒耜歡喜終年守妻子  
羊流店謁羊太傅祠

祠宇峩峩宰樹春神鴟無數下階馴遺民祈報同朱邑  
臨敵從容比祭遵鶴倦不堪迎俗客酒清還可飲強鄰  
平吳將士知多少墮淚終緣折臂人

蒙陰

百折疑無路緣坡盡莽榛岡巒垂一綫生歿寄雙輪怪  
石驚迴馬深坑暗引人乘危何所樂好練丈夫身  
朶莊旅舍題壁

平陵回首悵離羣臥石如羊路不分人語愁聽荒店雨  
馬蹏驚踏亂山雲江湖入夢思歸急餅餌浮香勸客勤  
我有青衫淪落感琵琶雖好那堪聞

二疏故里

賢哉二大夫保傳凜高位抽簪還故鄉父子稱同志公卿道旁送歎息久不置長揖衣冠流超然謝榮利歸來召故人共享君王賜連晨議酒脯不爲身家計惟其愛子孫所以散金幣悠悠親舊中何人知此意迢遙閱千載過客感風義豪傑滿瑯琊斯人誰與繼

青駝寺

萬石如牛馬垂頭飲澗谿山橋流水合祠樹曉雲齊虛殿苔痕滿殘碑字迹迷早鴉知避客飛過屋檐隳舟中有憶

晚臥疏篷底層波望不窮遠帆連暝色高樹入秋風歸  
計書千里狂歌酒一中遙憐妝閣坐獨對燭花紅  
與丹徒莊中白書係一絕句

涼風樹樹變秋聲纔盡山程又水程好待孤帆三五夜  
大江星月看潮生

舟過揚州思訪子與不果至京口却寄

凋年急景送登舟今日南歸憶舊游仙佛難成仍倦客  
江山如此又新秋晚攜明月浮京口疑趁長風下石頭  
如馬帆檣最超忽無由情語爲君畱

夜泊京口至風神廟訪沈增雲門

大江千里赴滄海金焦一束波濤雄沙際潮回集舟楫  
天邊月出驚魚龍風神恍惚如招我庭虛夜靜餘燈火  
高樓百尺淩層霄中有故人看月坐相逢大笑脫衣巾  
科頭袒臂酣老春羽衣吹笛東坡死七百年來無此人  
江南江北多形勝醉裏蒼茫動歸興挂帆明日下毘陵  
多謝風神有詩贈

晚泊丹陽城下

二更纖月落城郭暮蒼蒼孤客難爲寐秋風如此涼暗  
潮流曲港幽火出橫塘理櫂誰家子鼾聲臥榻旁  
無錫舟次七夕

清芬堂詩集卷四  
滿篷涼翠錫山秋已近鄉園未解愁月轉畫屏初夜冷  
有人扶睡看牽牛

閬門曉發

搖落秋爲氣蒼茫夜向晨滄洲遙辨樹孤棹乍歸人驛  
路重來熟鄉音臥聽眞吳江知漸近葭莢隔前津